

*Gentis
indoles.*

vinciæ vestræ quindecim superare miliones coronatorum, seu decies quinquies centies centena aureorum millia. Liber, cui inscriptus est populi Sinici numerus, assignat huic Provinciæ familias 124,2135, viros vero 4,525,470. Est autem gens hujus loci facilis ac comis, ingenio præstanti, idolorum cultui, ac superstitionibus dedita, unde & veritatem edocti, fidem synceram, Christianaque sacra facile suscipiunt, plurimique ex iis jam Christo dedere nomen fideique nostræ doctrina egregie sunt imbuti.

Ubique omnia rivis, amnibus ac fluviis pervia sunt, arte aut natura deductis commodissimis alveis, credas in Belgio te, locisque ibi mari proximis versari, imo & illa ab his superari. Plerosque fluviorum alveos à Boreali parte emanantes ita ars humanis usibus accommodavit, ac si ab ipsa natura ad id essent elaborati, difficulter intelligi ac credi potest, quomodo ad id perficiendum vires humanæ sufficere potuerint: videre est ut plurimum latissimas profundissimasque fossas ad longissima terrarum spatia deductas, in utraque ripa quadrato sectoque lapide ab imo fundo munitas; pontes altiores plurimis arcubus sibi incumbens onus egregie sustinentibus, adeoque per totam omnino Provinciam qua pedibus, qua navigio patens iter, quamvis tota innumeris prope modum minoribus insulis interfecta sit, ac divisa. Rariora reliqua, quæ hic sunt, in particulari urbium descriptione reperies.

Prima Urbs seu Metropolis

H A N G C H E V.

NE diutius Europæi Cosmographi in Marci Pauli Quinsai inquirenda, ac ridicule delineanda aberrent, hic ipsissimam illam dabo, cujus ne umbram quidem assecuta est Archontologia illa Cosmica, & si Deus votis faverit, transmittam fortasse cum tempore ipsum Sinicarum urbium ab ipsis Sinis longe ante Europæos impressum theatrum, numquam hæcenus visum Europæ quod quidem sciam. Verum ut, quod nunc instat, agamus, certissimis imprimis argumentis probo hanc urbem ipsam esse Quinsai Pauli Veneti: hæc enim illa est, quæ à Singui, hoc est Súcheú quinque dierum spatio distat, si loquamur de progressu ac itinere exercitus, in quo constat M. Paulum fuisse, aliàs enim vix quadridui iter est; hæc illa est, quæ illius tem-

pore regia erat Sinarum, quam Sinæ lingua erudita litteratorum Kingsu, communi hominum vulgare minus exacte loquentium Kingfai dicunt, unde Veneti nomen Quinsai fluxit; notandum porro hic Kingsu dignitatis nomen esse urbibus regiis commune, non autem uni proprium ac singulare, siquidem vere Regiam significat, quamvis sæpe eadem urbs proprium alioquin habeat nomen, uti hæc urbs Hancheu dicitur, quæ sub Sunga familia dicta est Lingan, quia ejus familiæ decimus Imperator Caoçungus Kin Tartaros fugiens hic regiam statuit: atque idcirco Veneti tempore Kingsu vocitata est, quidcumque demum hic alii sentiant; hæc autem acta sunt ad annum à partu Virginis millesimum centesimum quintum & tricesimum. in eadem quoque urbe Sunga familia regnum tenuit, donec magni Han Tartari occidentales, Kin Tartaros orientales è Catayo ejecerunt, hoc est ex Borealiorebus provinciis, atque ita tum debellati sunt, moxque victicia arma in regnum Mangin invexerunt, Australium Provinciarum scilicet occupatione cœpta. sed ut propius ad rem ipsam accedamus, hæc illa urbs est, quæ altissimos ac innumeros pœne habet pontes tum intra ipsa mœnia, tum extra in ipsis suburbiis, nec à vero aberunt multum decem etiam millia, quæ Venetus enumerat, si pontibus arcus triumphales accenseas, quos ob fornicis similitudinem potuit etiam Venetus in pontium habuisse loco, eodem modo, quo Tigrides Leones dixit; cum tamen ii minime hic uti fere in tota Asia non reperiantur. nisi velis eum non eos tantummodo qui intra aut extra urbem sunt, sed totius hujus territorii pontes esse complexum, ac tum quidem numerum illum suum, qui alias Europæis creditur videtur difficilis, facile etiam augere potuisset, tanta ubique pontium & arcuum triumphalium copia. accedit ad hujus rei confirmationem lacus quadraginta Italico- rum miliarium, Sihv vocant, qui quamvis intra mœnia non sit, illa tamen ab occasu in Austrum longo tractu lambit, ex eoque ducti sunt in ipsam urbem complures canales; ejus porro ripæ ita templis, monasteriis, palatiis, musæis ac privatorum domibus omni ex parte sunt obsitæ, ut intra amplissimam urbem, non ruri versari te credas. ad hæc ripæ undique quadrato sectoque lapide erectæ sunt, latissima ambulantium commodo relicta via; viæ etiam quædam per ipsum lacum transeunt pluribus usque altioribus

E e

pon-